

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Vigilance Awareness Week, 2025 pualin vawiin khan Sawrkar pisa hrang hrangah hlemhletna do tura thutiam an sawi rual.
- 2. Thla thar Nov ni 15 atanga Mizoram-a Territorial Army (Home & Hearth)-a tang turte lakna izawl-a neih turah a vawikhatna atan hmeichhia-te lak tel an ni dawn.
- 3. President Droupadi Murmu-i chuan officer thalai tak takte hnuaiah hmahun thil lo thleng tur atana inpuahchahna tha neih chu ram changkanna tur kawng pawimawh tak a ni a ti.
- 4. Vawiin khan Chhatisgarh-a Kanker district-ah Maoist hle 21 sawrkar kutah an inpe.



VIGILANCE AWARENESS WEEK

Vigilance Awareness Week, 2025 pualin vawiin khan Sawrkar pisa hrang hrangah Vigilance Awareness Week thutiam an sawi rual a, Kumina thupui hi 'Vigilance : Our Shared Responsibility' tih a ni.

Akashvani Aizawl-a thawktute chuan Director leh Mizoram Cluster Head Pu DR Lalropuia hovin an pisa Tuikhuahtlangah Vigilance Awareness Week thutiam an sawi rual a, Mizoram sawrkar pisa hrang hrangah pawh thutiam hi sawi rual a ni.

Chief Minister Pu Lalduhoma chuan vawiin Thawhtanni atanga Pathianni thlenga hman tur Vigilance Awareness Week, 2025 puala a thuchahah Mizoram chu Lakshadweep dawta eirukna tlemna berna state a nih thu a sawi a, Vigilance Awareness Week chu Hruì khat vuana eirukna leh hlemhletna do tura mipuite zirtir na’na hman thin a nih thu a sawi a. Mizoram sorkar Vigilance department pawhin kum 2018 atangin kumtin he hapta hi a hman thin thu a sawi a. Chief Minister chuan eirukna chu hmasawnna daltu, mipuiten an chanvo dik an chan theihlohna bul, Pathian huat zawng a nih thu a sawi a. Mahni chhungkua theuhah eirukna do hna huai taka kalpui tur leh eirukna sum atanga lei thil reng reng duh lo ngam turin mipuite a sawm a ni.

Pu Lalduhoma chuan eirukna laka fihlim theihna turin sorkar laipuiin an a siam thu leh sorkar hnathawkte chu CSS Conduct Rules, 1964 danin a phuar thu a sawi a. Prevention of Corruption Act, 1988 hnuai-ah Anti Corruption Bureau leh Mizoram Lokayukta din a ni tawh tih sawiin kumin chhungin eirukna leh a kaihnawih thilah ACB chu preliminary inquiry tih phalna 10 pek a nih tawh thu leh regular case siam phalna 5 pek an nih tawh thu a sawi a. Transparency International leh NITI Aayog data behchhana CMS India Corruption Study in a hmuhchhuah danin Mizoram chu Lakshadweep dawta eirukna tlemna ber state a nih thu leh thil chhinchhiah tlak leh chhuanawm tak a nih thu a sawi ni.

<><><>

BANDH

MNF Party Vice President leh Leader of Opposition Pu Lalchhandama Ralte chuan naktipa Forest Conservation Amendment Act pawm duh loh lantir nana Total bandh an buatsaih tur chu MNF tan a ni lo a, ram leh hnam tan a ni a ti.

Vawiina Aizawla an party office Mizo Hnam Run-a inkhawm ah he thu hi sawiin, ZPM sorkarin Central duh dan leh mipuite rawn lova FCAA 2023 a pawm avangin Article 371G hnuai-ah ram neitu an nihna a sut buai avangin Mizo mipuite thlavang hauh nan total bandh hi neih a ni dawn tih sawiin, FCAA 2023 chu an hotute nen do tul an ti a, sut leh a nih theihna turin thla hmasa September ni 3 khan Assembly Speaker hnenah special session kova ennawn leh turin an lo thlen tawh a. Hun engemaw chen an ngaihchan hnuah ram leh hnam humhim turin Mizoram pum huap total bandh neih chu an titlu ta tih sawiin, ram leh hnam chhan turin theihtawp an chhuah zel dawn a ti.

Pu Lalchhandama chuan tunhnaiah Chief Minister chuan FCAA leh 371G a sawi chungchang thudik lo leh zirtirna him lo a sawi ni a sawiin kum 2023-ah Parliament-in FCAA a pawm a, kum 2023 Aug 4-a gazette-a a chhuah khan MNF sorkar chuan NGO, Kohhran, political party leh environment pawlte rawnin an ngaihdan a lakhawm a. Kum 2023 Aug ni 22 khan Pu Zoramthanga kaihhruai sorkar leh opposition-ten lungrual takin a dodalna an pass ta a ti a, khatih laia phur ber leh sawi huai ber kha vawiina Mizoram CM hi a ni tih sawiin, sawi loh ang zela awm thiam chief minister a ni, a t.

Pu Lalchhandama chuan Mizoten ram dan hnuai-ah inhumhimna an neih that ber Article 371G hnuai-ah hnam dan leh nihphung customary law leh ram neih dan-land ownership chungchangah Parliament dan pass-te chuan Mizoram Assembly remtihna tel lovin an barh lui thei lo a ti a, FCAA hnuai-ah chuan sixth schedule hnuai-ah district council thuneihna pawh a tiderthawng ta vek a, an hnuk kir lo a nih chuan theihtawpin hma an la zel dawn tih a sawi a ni.

Hetihlai hian Agriculture Minister Pu PC Vanlalruata'n vawiin khan Aizawl-a ZPM Office ah thusawiin Forest (Conservation) Amendment Act, 2023 chu Central-a sawrkar mek NDA siam a ni a, chutih laia NDA thawhpuitu MNF ten dolet a, mipuite tana harsatna thlen zawng leh mi eizawna tibuai zawnga total bandh huaihawt an tum chu kalphung hlui zia a ni a ti.

Pu PC Vanlalruata chuan ram hmasawn tura an mu tan lian tak mai chu forest clearance a ni tih sawiin, FCAA chu House-ah ngun taka member-ten an sawi ho hnuah tha tiin an pass a ni a ti a, chutih laia mipuite tana harsatna thlen zawng leh

mi eizawnna tibuai zawnga total bandh huaihawt an tum te chu kalphung hlui zia a ni a ti a, khawpui kaihhnawiha eizawnna nasa takin a nghawng dawn a, sumdawnna hrang hrang - restaurant, transport, hotel, financial services, professional services, construction leh mining leh a dangte chu nasa takin a nghawng dawn tih a sawi.

Agriculture Minister chuan mithiamte chhut danin ni khat total bandh an huaihawt hian cheng nuai sang hnih chuang an hloh dawn a, a uiawm hle a ti a, chuvangin total bandh huaihawt tum tute pawh inngaihtuah tha leh se, an duh lohna chu chanchinbu leh social media-ah an tarlang hnem tawh tawh a, mi eizawnna nghawng zawnga sawrkar do chu ngaihtuah tha leh turin a ngen tih a sawi a ni.

<><><>

TERRITORIAL ARMY

Mizoram-a Territorial Army (Home & Hearth)-a tang turte lakna November ni 15 atanga November ni 25 inkar a Rajiv Gandhi Stadium, Aizawl-ah neih turah a vawikhatna atan hmeichhia-te lak an ni dawn.

He thu hi State Level Committee on Territorial Army Coordination and Establishment chairman Lt. Col. Clement Lalhmingthanga chuan vawiina PHQ Conference Hall-a chanchinbumite a kawmnaah sawiin, he hna lakna hi Mizoram Sorkar leh Assam tangkawpin an buaipui dawn a, a vawikhatna atan hmeichhia-te tan Territorial Army (Home & Hearth)-a an luh theihna tur a ni a. Territorial Army post 144 General Duty lak turah post 9 chu hmechhiate tana hauhsak a ni.

Lt. Col. Clement Lalhmingthanga chuan he hna lak tur hi Mizoram tana mellung pawimawh tak a ni tih sawiin, Mizo thalai hmeichhia leh mipa te chu ram leilung fa an nih anga mahni ram tana thawk a, venghim tura atana ke an pen ve theihna tur kawng hawnsak chu a tum ber pakhat a ni a ti a. Territorial Army atana lakte chuan Indian Army uniform nen chhuanawm taka ram tana hnathawkin, Indian Army te angin hlawh leh hamthatna bakah damdawia inenkawlina an dawng a ti a. An hnathawh that dan leh mawmawh dan a zirin Territorial Army te chu hun rei zawk atana chhawr theih leh hamthana hrang hrang Sorkar ruahman anga pek zui zel tur an ni a. An hnathawh tur hun chhung thawk zo te chu pension leh hmamthatna hrang hrang bakah India damchhungin an hlawh tawh dawn a. Tunah hian Sorkar Laipui chu 8th Central Pay Commission hman turin a inbuatsaih mek a, hei hian Territorial Army te hlawh leh hamthatna pawh a belhchhah dawn a ni a ti a. Mizo thalai, hmeichhia leh mipa Territorial Army dil thei zawng zawng te chu hun tha bawhpel lo turin a chah a ni.

<><><>

90TH ANNIVERSARY OF MZP

Education Minister Dr. Vanlalhlana Mizo Zirlai Pawl MZP din champhaphak vawi 90-na leh Zirlaite Ni pualin Mizoram chhung leh pawna zirlai zawng zawngte chu an zirna kawngah Pathian malsawmna an dawn zel theihnan duhsakna hlanin chibai a buk a, zirlaite chu rilru hriselna tha tak nei tura chahin ruihhlo leh zuk leh hmuam laka insum turin a chah a, zirlaite chu ram leh hnam hmakhua an nih avangin rilru leh taksa hrisel tak nei turin a chah a ni.

Byte: Education Minister Dr. Vanlalhlana

Vawiin khan MZP chuan an din champha vawi 90-na leh Zirlaite Ni Aizawl-a I & PR Auditoriumah an hmang a, he huna thusawitu MZP President Dr. C. Lalremruata'n MZP chu hrechiang lova nuihsawh leh beitu an tam tih sawiin, heng mite hi sorkar hna a dik lo taka lut te, hnamdang sumdawng mawngzawmpuia hlawkna tel ve te leh an chhungte an ni duh tlangpui tih a sawi.

MZP President chuan vawikhatmah MZP constitution la chhiar lote an ni a, pawn lam atanga en lova a chhung ngeia en turin a sawm a ni.

MZP chu zirlai pawl a nih angin zirna an ngaipawimawh tur a nih rualin nationalism an buaipui lo a nih chuan MZP chu engtikahmah a sang ngai dawn lo a ti a, zirna leh nationalism chu Mizo Zirlai Pawl innghahna, a lungphum a ni a, rualkhai taka a kal zel theih nan theihtawpa hmalak a tul hle a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

GST REFORMS CHAMPHAI

Thla liam ta September ni 22 atanga GST dan thar hman a nih hnuah Champhaia sumdawng lian zawk ten GST dan thar an zawm tha ni a sawi a ni.

Champhaia kan Correspondent in Deputy Commissioner of State Tax, Champhai Zone Pu David TS Zova a kawmna ah GST dan thar chu sumdawng lian te an zawm tha hle nia a hriat thu a sawi a, GST registration nei leh nei lovah thil man a nghawng dan a inan loh avangin dawrkai zawng zawngah thil man a tlakhniam phah vek rih lo a ti a. Stock thar an zawrh vek hunah erawh sumdawng ten rate thar angin thil an hralh vek tawh dawn tih a sawi.

Pu David TS Zova chuan GST rate thar hman hnuah survey an nei tih sawiin Rate hniam tur tihniam lote pawh tihniam nghal turin an hriih a ti a, Sumdawng thenkhat chuan a chhut dan an thiam loh vang leh a rate thar an hriat chian loh avanga tihhniam dan tur chin an hriat loh thu an sawiin heng sumdawngte hi a chhut dan tur an zirtir bakah an hralhna man turte pawh bungraw panga ziah thatsak te pawh an nei tih a sawi a ni.

Champhai Zone ah hian sumdawngten mipuiin chhiah an pek khawmte kim taka Sawrkara an chhun luh theihna turin cheng 200 man aia tam an inhralhna bungruaah chuan tax invoice an pek vek theihna turin tax invoice siam dan training an lo pe tawh a. Tax invoice pek thiam loh chu chhuanlam a tling tawh lo niin a sawi a. Hemi zawm lo an hmuh chhuah tawh sumdawng mi 24-te hnenah hremna cheng sing hnih theuh chawi turin lehkha an pek tawh thu a sawi a ni.

Taxation, Champhai Zone hian kum 2025-26 hian target cheng Nuai 965 leh sing 6 an nei a. September thla tawp thlenga an lakluh tawh zat chu cheng Nuai 924 sing 9 sang 2 za pahnih a ni a. An target atanga zaa 95.79 an lalut tawh a ni.

<><><>

PRESSIDENT

President Droupadi Murmu-i chuan officer thalai tak takte hnuaiah hmahun thil lo thleng tur atana inpuahchahna tha neih chu ram changkanna tur kawng pawimawh tak a ni a ti.Vawiina Indian Police Service probationers (2024) batch te nen an inkawmnaah he thu hi sawiin Pi Murmu-i chuan thalai officer zawkten sawrkar ah hmun pawimawh tak tak an chang chho zel ang a ti a. Heng dinhmun pawimawhte hian mawhpurhna sang zawk a keng tel tih hre reng turin a chah a ni.Pi Murmu-i chuan IPS officer te chu tunlai technology thar te hmang thiam ve tura chahin AI te pawh hmang tangkai turin a chah bawk a ni.

<><><>

NAXAL

Vawiin khan Chhatisgarh-a Kanker district-ah Maoist hle 21 sawrkar kutah an inpe. Union Home Minister Amit Shah chaun social media ah he thu hi tarlangin an zingah hian senior cadre 13 an tel a. Pu Shaha chuan kum 2026 March ni 31 hmaa ramchhunga Naxal hel zawng zawng nuai chimih an tum thu sawiin tuna ralthuam kenga la hel mek Naxal hote chu inpe ve thuai turin a hriattir a ni.

<><><>